



Inatsisartunut ilaasortaq  
Erik Jensen  
Siumut

21-03-2022  
Suliap normua 2022 - 6206  
Akt. id. 19500664

Postboks 260  
3900 Nuuk  
Tlf. (+299) 34 50 00  
Fax (+299) 34 63 64  
E-mail: isn@nanoq.gl  
www.naalakkersuisut.gl

## Meeqqanut akilersuutit pillugit § 37 naapertorlugu apeqquteqaat nr. 53/2022

Asasara Erik Jensen.

Apeqqutigisannut qujavunga. Apeqqutigisatit akissutitalerlugit uani ataani uteqqinneqartarput.

### 1. Inatsisartut inatsisiliarisimasaat pissutigalugu meeqqanut akilersuutitut kommuunit karsiminni kr. 418 mio. amigaateqarlersimanerat Naalakkersuisut pissusissamisoortutut ilumut isivaat?

Naamik, pisortanut akiitsut ingerlaavartumik amerliartornerat pissusissamisoortumik ingerlatseriaasiusutut isigineqartussaananerani Naalakkersuisut isumaqanngillat.

Naalakkersuinikkut Ataqatigiissaarisooqatigiit 2018-imi oqallinnerat tunuliaqutaralugu suliniummut suleqatigiissitamik pilersitsisoqarpoq, meeqqanut akilersuutit akilerneqarneq ajortut pillugit qulaajaasussamik. Suliniummut atatillugu suleqatigiissitamik pineqartumi kommuunit Naalakkersuisullu ilaasortaataitaqarput.

Naalakkersuisut suliniummut suleqatigiissitaq taanna aqputigalugu akiitsut pineqartut ukiuni qulikkaani amerliartuinnavissimasut qanoq aaqqissuussinikkut killilersimaarneqarsinnaanerani pillugu ingerlaavartumik eqeersimaartumillu oqallinnermi peqataapput.

Suleqatigiissitami meeqqanut akilersuutit akiligassat akiitsuulersut amerliartuinnarnerannut akiliisarnissamut piumassuseq amigaataanersoq imaluunniit akiliinnaassuseqannginneq pissutaanersoq ilaatigut oqallisigineqarsimavoq.

Paasissutissanut tunngaviusut pigineqartut misissoraanni isertitaqqortunerusunut sanilliullugit inuit isertitakinneqarput meeqqanut akilersuutit akiliineq ajornertik pissutigalugu pisortanut akiitsoqaleraluttuinnartarput amerlanerujussuusut ersarippoq. Akiitsut amerliartuinnartut 60 pct.-iisa missaat innuttaasunit ukiumut 100.000 kr.-it inorlugit isertitaqartarput pisuusarput.



Taamaattumik nassuerutigineqartariaqarpoq inuit isertitakitsut ilarpassuia meeqqanut akilersuutit maanna annertussuserisaat naapertorlugit akiitsuminnik akiliinissamut pisinnaassuseqanngimmata. Allatut oqaatigalugu taakkua akiliisinnaassuseqanngillat.

Tamatumunnga atatillugu ilanngullugu oqaatigineqassaaq suut arsaarinnissutigalugit pinngitsaaliilluni akiliisitsissutigineqarsinnaanerannut Kalaallit Nunaanni eqqartuussisarnermut inatsit killiliisuummat. Taamaalilluni akiitsoqartumut illoqatigisaanullu (pinngitsaaliissummik naammassititsineq) perataanngitsumik angerlarsimaffeqarluni inuunermi pigisanik nalilerneqartunik, arsaarinnittoqarsinnaanngilaq. Taamaattumik naatsorsuutigisariaqarpoq innuttaasut matumani pineqartut ilaanniit amerlasuuniit akiitsunik akiliisitsiniarsinnaaneq Kalaallit Nunaanni eqqartuussisarnermut inatsit naapertorlugu pinngitsaaliilluni akiliisitsisoqarsinnaasassanngitsoq.

Tamanna tunuliaqutaralugu Naalakkersuisut isertitat qanoq annertutiginerat apeqqutaatillugu aaqqissuussinissamik nutaamik suliaqarnermik aallartitsipput.

Isertitat qanoq annertutiginerat apeqqutaatillugit aaqqissuussinermi akiitsunik annertusiarortitsisarnerup pinaveersaartinneqarnissaa siunertaassaaq, tamatumuunlu amerlasuutigut akilerneqarsinnaasutut naatsorsuutigineqartartut eqqarsaatigalugit pisortanut akiitsut amerliartortarnerat unitsillugu imaluunniit minnerpaamik annikinnerulersillugu. Ilutigisaanillu aningaasat pineqartumut akilerneqartartut taakkuinnarnissaat siunertarineqarpoq.

## **2. Meeqqanut akilersuutininut tunngasoq Inatsisartut inatsisiliarivaat, taamaattumik akisussaaffiup Namminersorlutik Oqartussat ataaniikkuni pissusissamisoornerunngila?**

Suliassaqarfimmi inatsisiliorneq atuuttoq 1994-imeersuuvoq, taartaallunilu inatsimmut 1982-imeersumut. Inatsimmi maanna atuuttumi aamma siusinnerusukkut atuuttumi allaffissornikkut suliassanut akisussaaffik kommuniniippoq. Naalakkersuisut taamanikkut isumaqatigiinniarnert suliassanillu agguataarisimanermut isumaliutersuutaasut qanoq ittuusimanagerat ilisimasaqarfiginngilaat, kisiannili Namminersorlutik Oqartussanut sanilliullugu (siusinnerusukkut Namminersornerullutik Oqartussanut) innuttaasut kommuninut qaninnerusumik inissisimanagerat tunngaviusimassasoq ilimanaateqarpoq. Naalakkersuisut aamma ilisimanngilaat taamanikkut aningaasaqarnermut sammisortaannut atatillugit qanoq itunik isumaqatigiissuteqartoqarsimanersoq, tassa imaappoq suliassaqarfik kommunini akileraarutit isertut aqutigalugit aningaasalersugassaasimanersoq, imaluunniit Namminersorlutik Oqartussanut / Namminersornerullutik Oqartussanut ataatsimoortunik tapiissutit aqutigalugit aningaasalersugaasimanersoq.

Kommunit aamma Namminersorlutik Oqartussat akornanni suleqatigiinnermut isumaqatigiissummi *annertusisanik ataatsimut oqimaaqatigiissitsisarneq pillugu tunngaviusuinik* taaneqartartuni (DUT-imik ileqqoq) isumaqatigiissutigineqarpoq Namminersorlutik Oqartussat kommunini malittarisassanik aaqqissuussinerni kinguneqartitsisarnerannut atatillugu annertussusiliisarnernut aaqqissuussineq atorineqartoq. Ataatsimoorussanik kommuninut tapiissutit ingerlaavartumik aaqqiivigineqartarput, kommunini aningaasartuutit kingunerisaannut naapertuuttunngorlugit. Aaqqissuussineq illugiimmik atortinneqarpoq, taamalu malittarisassanik allannguinnikkut kommunit aningaasartuutaat annikinnerulersinneqaraangata assigisaannik ataatsimoorussanik tapiissutit ikilineqartarlutik. Meeqqanut tapisianik aaqqissuussinerup Namminersorlutik Oqartussanut tamakkiisumik nuussisoqarluni malittarisassanik aalajangersakkanik allannguisoqassappat Namminersorlutik Oqartussat aningaasartuutaasa amerlimerisa amerlaqataanik kommuninut ataatsimoorussanik tapiissutit ikilineqassapput.





Taamatut aaqqissuussinermik allannguuteqartitsineq innuttaasunut, kommuninut imaluunniit Namminersorlutik Oqartussanut iluaqutissartaqassanngilaq. Paarlattuanilli aarleqqutigineqarsinnaavoq, innuttaasup pisortallu akornanni imminut qaninnerup iluaqutissartaqarfigisinnaasaani innuttaasup suliassamillu ingerlatsisuusut oqartussat akornanni suliassaqarfimmi tassani ungasinnerulertoqaannassasoq.

### 3. Qaqugu suleqatigiissitap sulinini aallartinniarpa?

Suleqatigiissitaq, Naalakkersuinikkut Ataqtigiissaarisartoqatigiit 2018-imi oqallisigisaat tunngavigalugu 2019-imi pilersineqartoq, novembarimi 2021-imi inaarutaasumik ataatsimiippoq, tassanngalu oqaluserineqartut suleqatigiissitamillu paasissutissat tunngaviusut katersorneqarsimasut tunngavigalugit isertitat aallaavigalugit aaqqissuussinissamik suliagarneq ingerlateqqinneqarluni.

Ilanngullugu eqqaaneqassaaq Naalakkersuinikkut Ataqtigiissaarisartoqatigiinni ulloq 27. februar 2022-mi ajornartorsiut sammeneqarsimammat.

#### a. Qaqugu allannguutissatut siunnersuutit saqqummiunneqassapat?

Isertitat aallaavigalugit aaqqissuussinissamik siunnersuummik UKA2022-imi imaluunniit UPA2023-imi saqqummiussisoqarsinnaajumaartoq naatsorsuutigineqarpoq.

### 4. Meeqqanut akilersuutininut akisussaaffiup kommuuninut inissinneqarsimanera kommuunit qanoq isumaqarfigineraat Naalakkersuisut apeqqutiginiikuvaat?

Oqaatigineqareersutut suliassaqarfimmi akisussaaffiup annertunersaa 1982-imiit immaqaluunniit suli siusinnerusumiit kommuniniissimavoq.

Suliassaqarfimmi pisariaqassappat allannguisoqarsinnaanissaa siunertaralugu misissueqqissaartoqarnissaa 2008-imi ataatsimoorussanik kommuninut tapiissutit isumaqatigiinniutigineqarnerinut atatillugu isumaqatigiissutigineqarpoq. Tamatuminnga misissueqqissaartoqarsimanersoq Naalakkersuisut ilisimasaqarfiginngilaat.

#### a. Qanga kingullermik apeqqutigivaat?

Takuneqarsinnaasut naapertorlugit apeqqut kommuninut ataatsimoorussanik tapiissutit pillugit 2009-mi isumaqatigiinniarnernut atatillugu kingullermik oqallisigineqarsimavoq, misissueqqissaarnerullu kommuninut ataatsimoorussanik 2010-mi isumaqatigiinniarnissanut kinguartinneqarnissaa ilalerneqarsimalluni, siulianilu eqqaaneqareersutut misissueqqissaarnerup taamaattup suliarineqarsimanera takussutissaqanngilaq.

Inussiarnersumik inuulluaqqusillunga

Mimi Karlsen